



Број/Број: **03/1-50-1-7-46/09**  
Сарајево/Sarajevo, 28. 12. 2009.

## **Z A P I S N I K**

### **46. sjednice Zajedničke komisije za odbranu i sigurnost BiH** **Parlamentarne skupštine BiH,** **održane 28. 12. 2009., od 10 do 11,30 sati**

Sjednici su prisustvovali sljedeći članovi Zajedničke komisije: Branko Zrno, Šefik Džaferović, Slobodan Šaraba, Vinko Zorić, Ivo Miro Jović, Drago Kalabić, Mirko Okolić, Dušanka Majkić, Hazim Rančić i Adem Huskić.

Sjednici od članova Zajedničke komisije nisu prisustvovao Sulejman Tihić.

Sjednici su prisustvovali i gosti, predstavnici medija, kao i predstavnici Sekretarijata Parlamentarne skupštine BiH:

- Boško Šiljegović, parlamentarni vojni povjerenik BiH,
- Velibor Lučić, Ministarstvo vanjske trgovine i ekonomskih odnosa BiH,
- Šejla Bektašević, Misija OSCE-a u BiH,
- Christian Haupt i Nedim Hogić, USAID PSP u BiH,
- Sanita Rožajac, „Dnevni avaz“,
- Alma Tajić, Sekretarijat PSBiH,
- Zoran Brkić, Sektor za odnose s javnošću PSBiH,
- Goran Špirić, savjetnik u kabinetu Dušanke Majkić,
- Dragica Hinić, sekretar Zajedničke komisije za odbranu i sigurnost BiH, Željko Grubešić, stručni savjetnik, i Jovica Katić, stručni saradnik u Zajedničkoj komisiji za odbranu i sigurnost BiH.

Početak sjednice predsjedavao je **Šefik Džaferović**, prvi zamjenik predsjedavajućeg Zajedničke komisije za odbranu i sigurnost BiH, s obzirom da se predsjedavajući Branko Zrno uključio u rad sjednice nešto kasnije. Prije rasprave o dnevnom redu napomenuo je da je ovo prva sjednica Komisije koja se održava nakon smrti Jozе Križanovića, poslanika u Predstavničkom domu PSBiH i člana Zajedničke komisije za odbranu i sigurnost BiH, te zamolio prisutne da minutom šutnje odaju počast preminulom kolegi.

Nakon toga otvorio je raspravu o predloženom dnevnom redu.

**Dušanка Majkić** zatražila je da se u okviru tekućih pitanja uvrsti nova točka c), koja će se odnositi na Informaciju dostavljenu od Ministarstva odbrane BiH pod oznakom „Povjerljivo“ u vezi s rješavanjem višaka naoružanja, municije i minsko-eksplozivnih sredstava OSBiH. Navela je da je ona jedini član Komisije koji nije dobio kompletan materijal u vezi s ovim predmetom, te napomenula da je od urgencije za dostavu materijala upućene Ministarstvu odbrane BiH prošlo skoro 20 dana. Stoga ovo treba biti predmet rasprave na ovoj sjednici u okviru tekućih pitanja.

**Šefik Džaferović** je, zaključujući raspravu o dnevnom redu, naveo da će Zajednička komisija na svojoj narednoj sjednici imati raspravu o ovoj temi, ali se saglasio da se u okviru tekućih pitanja raspravlja o primjedbi Dušanke Majkić na dostavljanje materijala od predlagača Informacije.

Zatim je dao na glasanje prijedlog Dušanke Majkić za dopunu dnevnog reda.

Članovi Zajedničke komisije su, sa sedam glasova „za“ i jednim glasom „protiv“, bez „suzdržanih“ glasova, prihvatili prijedlog Dušanke Majkić o dopuni dnevnog reda, nakon čega je konstatirano da 46. sjednica Zajedničke komisije za odbranu i sigurnost BiH ima sljedeći

## **DNEVNI RED**

1. Usvajanje Zapisnika 45. sjednice Zajedničke komisije;
2. Razmatranje Poslovnika o radu parlamentarnog vojnog povjerenika BiH (sačinilac: parlamentarni vojni povjerenik BiH);
3. Razmatranje Informacije o izdatim dozvolama za promet oružja, vojne opreme i proizvoda dvojne namjene (sačinilac: Ministarstvo vanjske trgovine i ekonomskih odnosa BiH);

4. Zabilješka sa sastanka između članova Kolegija Predstavničkog doma PSBiH, delegacije PSBiH u Parlamentarnoj skupštini NATO-a s generalnim sekretarom NATO-a Andersom Foghom Rasmussenom, 27.11.2009. (sačinilac: Ministarstvo vanjskih poslova BiH);
5. Informacija o sastanku Vijeća EU o vanjskoj politici, 17.11.2009., Brisel (sačinilac: Ministarstvo vanjskih poslova BiH);
6. Tekuća pitanja:
  - a) Informacija o održanoj radionici o temi: Prijedlozi budžeta institucija odbrambenog i sigurnosnog sektora na nivou BiH za 2010.godinu, Tuzla, od 19. do 20.11.2009.;
  - b) Izvještaj o učešću na regionalnoj konferenciji o temi: Jačanje sigurnosne saradnje za što skoriji pristup Jugoistočne Evrope Evropskoj uniji, Tirana, 7. i 8.12.2009.;
  - c) Prigovor Dušanke Majkić na dostavljanje materijala u Informaciji o rješavanju višaka naoružanja, municije i minsko-eksplozivnih sredstava OSBiH.

#### **Ad. 1. Usvajanje Zapisnika 45. sjednice Zajedničke komisije**

Kako nije bio primjedbi na predloženi tekst, Zajednička komisija je jednoglasno, sa osam glasova „za“, usvojila Zapisnik 45. sjednice Zajedničke komisije.

#### **Ad. 2. Razmatranje Poslovnika o radu parlamentarnog vojnog povjerenika BiH (sačinilac: parlamentarni vojni povjerenik BiH)**

Šefik Džaferović napomenuo je da je u pitanju podzakonski akt urađen u skladu s odredbama Zakona o parlamentarnom vojnom povjereniku BiH, te naglasio da tekst ovog poslovnika, nakon Komisije, usvajanju oba doma PSBiH.

Pozvao je članove Komisije da podrže predloženi tekst Poslovnika.

Zajednička komisija potom je jednoglasno, s devet glasova „za“, usvojila Poslovnik o radu parlamentarnog vojnog povjerenika BiH i prosljedila ga domovima PSBiH u daljnju parlamentarnu proceduru.

### **Ad. 3. Razmatranje Informacije o izdatim dozvolama za promet oružja, vojne opreme i proizvoda dvojne namjene (sačinilac: Ministarstvo vanjske trgovine i ekonomskih odnosa BiH)**

**Šefik Džaferović** zamolio je predstavnika resornog ministarstva da da uvodne napomene u vezi s ovom informacijom.

**Velibor Lučić**, predstavnik Ministarstva vanjske trgovine i ekonomskih odnosa BiH, naveo je da je Informacija urađena kao i informacije iz prethodnih godina, u skladu s evropskim pravilima izvještavanja iz ove oblasti. Ona obuhvata sve podatke o izdatim dozvolama uvoza i izvoza naoružanja i vojne opreme i proizvoda dvojne namjene. Naglasio je da u 2008. godini nije bilo nekih većih problema kada je u pitanju uvoz i izvoz naoružanja i vojne opreme. Odbijeno je tek pet dozvola za izvoz naoružanja u Gruziju, zbog situacije u toj državi. U 2008. godini izdate su ukupno 382 dozvole, koje su razvrstane po proizvodnim kategorijama.

**Šefik Džaferović** pozdravio je predsjedavajućeg Branka Zrnu, koji se u međuvremenu priključio sjednici i informirao ga o dotadašnjem toku sjednice. Gosp. Zrno nastavio je dalje vođenje sjednice i otvorio raspravu o Informaciji.

**Mirko Okolić** primijetio je da na 6. stranici u tabeli stoji da se vrijednost izdatih dozvola za izvoz roba u navedene zemlje kreće u iznosu od 50.257.000 KM, te zatražio odgovor koliko je od toga uistinu realizirano, odnosno koliko je robe stvarno izvezeno? Još je zamolio da mu se pojasni podatak o privremenom izvozu oružja i vojne opreme u 2008. godini, naveden ispod ove tabele.

**Slobodan Šaraba** smatra da Zajednička komisija, kao nadležna komisija koja provodi nadzor nad ovom oblašću, treba da dobije znatno više podataka, nego što su prezentirani podaci koji imaju birokratski karakter. Mišljenja je da se iz ove informacije ne vide suštinski podaci, kao što su imena vlasnika dozvola, odnosno odbijenih po zahtjevu za dobivanje dozvole. Njegov interes ide upravo u smjeru da Komisiji budu prezentirana imena firmi koje su dobile dozvole da se mogu baviti tom vrstom djelatnosti, kao i imena onih firmi koje su odbijene, sa svim navedenim razlozima odbijanja. Stoga, ovakva informacija, s taksativno navedenim podacima, za njega nije dovoljna. Također je zamolio da mu se prezentira šta je to BiH trgovala s Afganistanom.

**Velibor Lučić** naveo je da ne može odgovoriti na pitanje Mirka Okolića, jer još uvijek postoje dozvole koje su važeće. Pojašnjavajući podatak o privremenom izvozu oružja i vojne opreme u 2008. godini, naveo je da su posebno u aneksu C obrađene izdate dozvole koje se odnose na privremeni izvoz naoružanja i vojne opreme, a tu se uglavnom radi o robi koja odlazi privremeno u druge zemlje radi popravke i remonta i kasnije se ponovo vraća krajnjem korisniku u BiH. Odgovarajući na upit Slobodana Šarabe u vezi sa izvozom u Afganistan, naveo je da su dvije bh. firme koje su registrirane za proizvodnju i promet naoružanja i vojne opreme, a to su „BNT“ iz Novog Travnika i „Igman“ iz Konjica, imale izvoz u Afganistan. Naveo je da je pri tome uvoznik dostavio svu potrebnu dokumentaciju, koju su ovjerile koalicione snage stacionirane u Afganistanu. Krajnji korisnik ove opreme je Narodna Armija Afganistana, Ministarstvo odbrane i Ministarstvo unutrašnjih poslova Afganistana, s čije strane postoji sva uredna i originalna dokumentacija za sve izdate dozvole. Pojašnjavajući sam način izvještavanja, naveo je da je ona sačinjena u skladu s pravilima EU o izradi ovih informacija, te naveo da Ministarstvo može u narednom periodu za potrebe Komisije i Parlamenta pripremiti detaljnu informaciju u kojoj će biti navedene sve firme koje su izvezile naoružanje i vojnu opremu, kao i njihovu ukupnu vrijednost, te iskorištenost svake pojedinačne dozvole.

**Dušanka Majkić** istakla je da ono što je objavljeno na zvaničnoj veb-stranici Ministarstva vanjske trgovine i ekonomskih odnosa BiH ne treba biti materijal koji će biti dostavljen članovima Komisije koja vrši kontrolu cijelog ovog procesa. Ovaj materijal ne sadrži elemente na osnovu kojih bi se mogla voditi prava rasprava. Naglasila je da Zajednička komisija na ovoj sjednici treba usvojiti zaključak koji proizilazi iz člana 11. Zakona o uvozu i izvozu naoružanja i vojne opreme, a koji kaže da Ministarstvo uspostavlja bazu podataka o izdatim dozvolama i svakih šest mjeseci dostavlja Parlamentarnoj skupštini BiH izvještaj o izdatim dozvolama. U tom smislu predložila je da Zajednička komisija, prije svega, od predlagača zatraži dopunjenu informaciju, sa sistematičnijim i detaljnijim podacima navedenim u njoj o tome zašto određene dozvole nisu izdate, ko ih je zloupotrijebio, itd. S druge strane, u skladu s navedenim zakonskim odredbama, zatražila je da se ubuduće Zajedničkoj komisiji potpuni podaci vezani za ovu materiju dostavljaju svakih šest mjeseci, jer se na osnovu podataka navedenih u ovoj informaciji ne može voditi rasprava.

**Adem Huskić** istakao je da je ova informacija uvijek dolazila u ovakvoj formi, iako se saglasio sa diskusijom svojih prethodnika da ona treba biti dopunjena. Mišljenja je da je Komisija na dopune ovakvog oblika informiranja predlagaču trebala ukazati početkom svog mandata, jer bi do sada imala puno kvalitetnije informacije. Nadalje, naveo je da je u 2007.

godini izdato dozvola za promet naoružanja i vojne opreme u ukupnom iznosu od 60 miliona eura, dok je u 2008. godini povećano izdavanje dozvola za oko 35 %, čime je zaključio da je ova vrsta namjenske industrije onaj tip industrije koja ima trend razvoja i u budućnosti bi trebalo da ima punu veću ulogu u društvu nego što je to sada. Analizirajući pojedinačne podatke, naveo je da je najveću razmjenu BiH ima s Bugarskom, koja je članica NATO-a, a zatim sa Švicarskom, kao izuzetno tehnološki razvijenom državom, te s Turskom, također, članicom NATO-a. Još je rekao da BiH ovakvu vrstu saradnje i razmjene treba afirmirati i dalje proširivati i sa Srbijom, Hrvatskom i drugim zemljama u susjedstvu.

**Hazim Rančić** mišljenja je da sama informacija ništa ne znači ako uz nju nije priložena lista realiziranih ugovora po izdatim dozvolama sa spiskom vrste naoružanja i vojne opreme. Nadzor koji Komisija provodi mora biti potpun i cjelokupan, te zato ova informacija treba da bude dodatno dorađena.

**Ivo Miro Jović** rekao je da je tačna konstatacija predstavnika Ministarstva vanjske trgovine i ekonomskih odnosa BiH da je posljednjih nekoliko godina identična metodologija izrade ovih informacija, koje se rade u skladu sa instrukcijama koje je napravila EU 2000. i 2003. godine, ali da članovi Komisije nisu zadovoljni načinom na koji su podaci prezentirani u Informaciji. Stoga je zamolio da se Informacija podrži i predložio da Zajednička komisija, s ciljem buduće olakšane izrade informacije, ukaže resornom ministarstvu na to šta je to što je zanima i šta sljedeća informacija ovog tipa treba sadržavati.

**Branko Zrno** naveo je da je iz navedene diskusije jasno da je Komisija na razmatranje dobila informaciju, a ne izvještaj, čiji su forma i rok dostavljanja predviđeni Zakonom svakih šest mjeseci, te da se ona u tom smislu u ovom trenutku može samo primiti k znanju. Stoga je predložio da Komisija usvoji i domovima PSBiH predloži sljedeći prijedlog zaključaka proisteklih iz rasprave:

1. Zajednička komisija prima k znanju Informaciju o izdatim dozvolama za promet oružja, vojne opreme i proizvoda dvojne namjene, koju je sačinilo Ministarstvo vanjske trgovine i ekonomskih odnosa BiH;
2. Primanje Informacije k znanju ne znači istovremeno i proces potpune demokratske kontrole uvoza i izvoza oružja i vojne opreme, te se od nadležnog ministarstva zahtijeva da:
  - a. postupa u skladu sa zakonskim odredbama koje reguliraju pitanje prometa oružja i vojne opreme i u utvrđenim rokovima izvještava Parlamentarnu skupštinu BiH o prometu oružja i vojne opreme;

- b. uz informaciju o izdatim dozvolama za promet oružja, vojne opreme i proizvoda dvojne namjene, dostavlja i podatke o stvarno realiziranom izvozu/uvozi oružja, vojne opreme i proizvoda dvojne namjene po izdatim dozvolama, kao i odbijenim zahtjevima za izdavanje dozvola.

Zajednička komisija je, s pet glasova „za“, dva glasa „protiv“ i jednim „suzdržanim“ glasom, usvojila ovako definirane zaključke i prosljedila ih zajedno s Mišljenjem o ovoj informaciji na usvajanje domovima PSBiH.

**Ad. 4. Zabilješka sa sastanka članova Kolegija Predstavničkog doma PSBiH, delegacije PSBiH u Parlamentarnoj skupštini NATO-a s generalnim sekretarom NATO gosp. Andersom Foghom Rasmussenom, 27.11.2009. (sačinilac: Ministarstvo vanjskih poslova BiH)**

**Branko Zrno** naveo je da je u pitanju Informacija sa sastanka sačinjena u formi zabilješke i otvorio raspravu.

**Vinko Zorić** sugerirao je da se na 3. stranici Zabilješke, iza imena Ive Mire Jovića i Halida Genjca, umjesto dužnosti zamjenik delegacije napiše njihova stvarna dužnost - član delegacije.

Zajednička komisija potom je primila k znanju ovu zabilješku, uz sugestiju za ispravku koju je predložio Vinko Zorić.

**Ad. 5. Informacija o sastanku Vijeća EU o vanjskoj politici, 17.11.2009., Brisel (sačinilac: Ministarstvo vanjskih poslova BiH)**

Kako o ovoj tački dnevnog reda nije vođena rasprava, Zajednička komisija primila je k znanju Informaciju o sastanku Vijeća EU o vanjskoj politici, održanog u Briselu 17.11.2009., a koju je sačinilo Ministarstvo vanjskih poslova BiH.

## **Ad. 6. Tekuća pitanja:**

- a) **Razmatranje Informacije o održanoj radionici o temi: "Prijedlozi budžeta institucija odbrambenog i sigurnosnog sektora na nivou BiH za 2010.godinu", Tuzla, 19. i 20.11.2009.**

**Branko Zrno** ocijenio je da ove godine radionica nije bila uspješna kao prethodnih godina, te zaključio da naredna radionica na kojoj će se raspravljati o budžetima institucija odbrambenog i sigurnosnog sektora na nivou BiH za 2011. godinu treba biti održana nešto ranije nego što je to bio slučaj ove godine.

Zajednička komisija potom je primila k znanju Informaciju o Radionici o temi: „Prijedlozi budžeta institucija odbrambenog i sigurnosnog sektora na nivou BiH za 2010.godinu“, održanoj u Tuzli 19. i 20. 11. 2009.

- b) **Izvještaj o učešću na regionalnoj konferenciji o temi: „Jačanje sigurnosne saradnje za što skoriji pristup Jugoistočne Evrope Evropskoj uniji, Tirana, 7. i 8.12.2009.**

**Mirko Okolić** je prilikom rasprave o ovom izvještaju naveo da delegacija Zajedničke komisije nije imala jedinstven stav kada je u pitanju potpisivanje Deklaracije o saradnji parlamenata Jugoistočne Evrope. Naime, on se usprotivio potpisivanju ove deklaracije jer je u radu Konferencije učestvovala i delegacija Kosova, koja nije zvanično priznata od Bosne i Hercegovine. Zaključio je da je on bio protiv potpisivanja ove deklaracije, navodeći da u njenom sadržaju nema ništa sporno osim činjenice da predstavnik delegacije BiH stavlja svoj potpis, između ostalih, i pored predstavnika delegacije Kosova, te s tim u vezi zatražio da se napravi novi izvještaj koji će u sebi sadržavati činjenice navedene u njegovoj diskusiji.

**Ivo Miro Jović** istakao je da je tačno sve što je Okolić naveo u svojoj diskusiji, ali je pojasnio da su predstavnici Albanije, kao zemlje domaćina, nastojali da Konferencija rezultira dokumentom koji će potpisati predstavnici svih zemalja učesnica, a koji će biti osnova daljih razgovora u nacionalnim parlamentima. Potpisivanje ovakvog dokumenta predstavlja samo sugestiju zemljama učesnicama da inicijativa za formiranjem jednog



ovakvog tijela, kao što je Parlamentarna skupština Jugoistočne Evrope, bude predmet razgovora, u domovima PSBiH, kao i u domovima parlamenata drugih država.

**Adem Huskić** naveo je da je prvobitni prijedlog ove deklaracije sadržavao nazive svih zemalja učesnica, te da je delegacija BiH svojom diskusijom uticala na to da se taj tekst preformulira u formu deklaracije koju je, na kraju, on potpisao kao šef bh. delegacije. Napomenuo je da je pored svog potpisa stavio zvjezdicu, uz koju je u fusnoti napisao da njegov potpis ničim ne prejudicira budući status Kosova.

**Dušanka Majkić** istakla je da je Komisija nedavno razmatrala Informaciju u vezi sa stavovima koje naša zemlja treba zauzeti u okviru Jadranske povelje, te podsjetila da je tom prilikom Komisija usvojila samo dio teksta. Sugerirala je da se ovaj izvještaj dopuni s obzirom da u njemu nedostaju objašnjenja koja govore o nejedinstvenom stavu delegacije BiH u vezi s potpisivanjem Deklaracije.

**Vinko Zorić** saglasio se s prethodnom diskusijom i predložio da se ovaj izvještaj vrati delegaciji na doradu, uz sugestiju da u njemu piše ono što nikome neće smetati, čime bi on na kraju bio prihvaćen.

**Slobodan Šaraba** također se saglasio s prijedlogom da se ovaj izvještaj dopuni, unoseći u njega ono što je u svojoj diskusiji iznio Mirko Okolić, te naveo da bi bilo dobro da tako usaglašen Izvještaj potpišu sva tri člana delegacije. On je podsjetio da se početkom godine na Konferenciji Jadranske povelje našao u sličnoj situaciji, te se zahvalio Branku Zrni i Šefiku Džaferoviću na razumijevanju što su uvažili njegov stav tom prilikom.

Nakon rasprave, članovi Komisije podržali su prijedloge za dopunu izvještaja navedenih u raspravi.

### **c) Prigovor Dušanke Majkić na dostavljanje materijala u Informaciji o rješavanju višaka naoružanja, municije i minsko-eksplozivnih sredstava OSBiH**

**Dušanka Majkić**, kao predlagač ove tačke, navela je da je jedini član Komisije koji nije dobio priloge broj 2 do 6, koji su sastavni dio Informacije o rješavanju višaka naoružanja, municije i minsko-eksplozivnih sredstava OSBiH, te napomenula kako je prošlo već 20 dana kako je Zajednička komisija Ministarstvu odbrane BiH uputila dopis u vezi s dostavom materijala. Stoga je predložila da se angažira parlamentarni vojni povjerenik koji će istražiti zašto joj ova informacija nije dostavljena u potpunosti.

**Branko Zrno** naveo je da je moguće da se greška desila bez ikakve zle namjere, te upoznao članove Komisije da su predstavnici Sekretarijata Zajedničke komisije razgovarali sa sekretarom Ministarstva odbrane BiH, koji je kao moguće rješenje ponudio da se Dušanki Majkić dostave materijali koji su bili namijenjeni pokojnom Jozi Križanoviću.

**Dušanka Majkić** navela je da ne može biti održana sjednica Zajedničke komisije na kojoj će se razmatrati ovo pitanje, dok ona ne dobije kompletirane materijale, s čim se saglasio i predsjedavajući Komisije.

Zapisnik sačinila

**Dragica Hinić**

PREDSJEDAVAJUĆI KOMISIJE

**Branko Zrno**

Dostavljeno:

- naslovu
- a/a